



TALOFA LAVA!

E muamua ona faatalofa atu i le mamalu o le Ekalesia ua potopoto mai e molimauina le Faamanuia a le Kolisi i lenei tausaga 2008. Ou te faatalofa atu i le Taitaifono o le Fono Tele, o le Sui Taitaifono ma le paia o la outou Laulau, i le Failautusi Aoa faapea le Teutupe, o le Taitaifono o le Komiti a le Au Toeaina faapea le Failautusi, o le Komiti a le Au Toeaina faapea Komiti taitasi a le Ekalesia, teinane foi le aoao o le Ekalesia i ona tulaga faalupe, i Susuga i faifeau ma aoao, o matua, o uo ma aumeamamae a lenei Kolisi, e o molimauina lenei aso fiafia o le Vasega Faaiuso. Ia viia pea le alofa ma le agalelei o lo tatou Atua ona o ana faamanuiaga ua mafai ona molimauina i lenei tausaga atoa. Ou te talitonu o lau tapuaiga ma la outou tatalo, ua sao ma manuia ai fuafuaga uma a le Kolisi i lenei tausaga. E muamua ona ave le faamalo i aoao ma faletua faaiuso o lenei



Polofesa Otele Perelini - Pule o le Kolisi

tausaga, ona ua a'e malo lo outou faamoemoe e pei ona aotauina i lenei fa tausaga i Malua. Faamalo le tauivi, faamalo le onosai, faamalo le galulue! O lenei ua tau lau o le faamoemoe sa nofo tapuai ai lau Ekalesia aemaise outou matua ma aiga. Tatou ave la le faamua ma le viiga i le Atua, aua o la ua na faia mea silisili tatou te olioli ma fiafia i ai. E le faagaloina la outou Vasega i totonu o lenei aai, aemaise ai lo outou tautua ma

mea lelei e tele sa outou faia aua le manuia o le Kolisi, e pele i o outou loto. Tau ina alofa pea le Atua i lo outou taapeape atu i nuu ma aiga, ma le Ekalesia, ma ia saga faamanuia pea e le Atua fuafuaga uma mo le lumanai. E momoli atu foi faamanuiaga mo lau Susuga i le faiaoga Sesera ma le Faletua ia Litara ma le fanau, e tusa ma le faamoemoe ua valaauina ai mo le aulotu i Blockhouse Bay, Aucklandi. O le tatalo, ia alofagia e le Atua lo oulua faamoemoe, ma ia avea pea oulua soifua ma ala o faamanuiaga a le Atua mo lana fanau.

Tau ina maua pea e i tatou uma se Kerisimasi fiafia ma se Tausaga Fou ua tumu i faamanuiaga a le Atua.

Soifua,

Otele Sili Perelini

PULE O LE KOLISI

SILASILA I TOTONU

Ripoti Fonotaga i Ghana Aferika	2	Mafuta le Kolisi ma Oka Fauolo / Ripoti: Malua Kindy	9
Meaalofa Faaiuso - Palau Moa Vao / Suia Afi Eletise	3	Ia Motu le Pa A Ua Iloa	10, 11
Ripoti: Mafutaga A'oa'o 2008 / Aoga Aso Sa	4	Rev Dr Peniamina Vai: A Tribute	12
Ripoti: Taaloga A'oa'o	5	Mafutaga Faafoina 2008	13
Ripoti: Mafutaga Faletua 2008 / Taaloga Faletua	6	Mafutaga Sosaiete Suesue I le Tusi Paia	14
Face to Face (India) / Aoga Tusi Paia i Malua	7	Ripoti: Pa Povi	15
Sesera ma Litara Tolovaa / Ripoti: Autalavou Laiti	8	Ata - O Vaaiga Eeseese o Faletua Malua 2008	16

RIPOTI A LE SUIPULE:FONOTAGA I GHANA (PRIMAL RELIGION IN AN AFRICAN SETTING)



**Rev Dr Featunai Liuaana &
Andrew Walls**

The ongoing consultation on the theme 'Primal Religion as a Sub-structure of Christianity' took the group of scholars to Akrofi-Christaller Institute of Theology, Mission, and Culture [ACI] in Akropong – Akuapem, Ghana, Africa, for a meeting from the 13th – 24th October, 2008. It is the second time that scholars from around the world had gathered to discuss an issue that was important for Christianity in the South, especially in Africa, South America, Asia, and the Pacific. It was, however, a sad beginning to the consultation, as one of the leaders from the first consultation at Calvin College in Michigan, America, in 2007, Dr Kwame Bediako, had passed away during the year. He was a great strength behind the consultation and his insights and resourcefulness was sorely missed during the consultation. But, not all was lost. There were still Dr. Andrew Walls from Edinburgh, Scotland, and Dr Mary Bediako, who kept the group together and focused on its aim.

The two weeks in Ghana was divided into two parts. The first was the observation of the annual festival called *Odwira*, which relates to the cleansing of the town and the remembrance of ancestors. The

festival was an eye opener as it had many elements which many would consider 'pagan', 'heathen', and un-Christian. But, the local people who participated in the festival saw everything they did as an extension of their Christian faith and daily living. During the festival there was great respect shown for ancestors, and the invitation of the ancestors to participate in the *Odwira* was important as the people believe that the dead, the living, and those not yet born, were part and parcel of the community and all had the right to participate in community affairs, including festivals. There was offering of food to the ancestors as well as the blessings of the people and the chiefs in the presence of the ancestors. One of the final rituals of the week was the offering or sacrifice of a goat to the *Mpeni* Tree in the centre of the town which people believe had kept the town, together with the blessings of God through Jesus Christ, intact. There were many similarities within the festivals with Samoan rituals and primal religious aspects that our ancestors had practiced in the past.

The second week was dedicated to the presentation of revised papers, which would be published by ACI in its African Journal of Theology in January 2009. The focus of the papers was on primal religion and primal experiences of Christians and how they deal with such experiences in their daily lives as Christians. Dr. Andrew Walls and Dr. Mary Bediako outlined the foundation and reasons behind the theme of the consultation, 'Primal Religion as a Sub-structure of Christianity', and gave biblical texts in support of it. The rest of the papers were revised to show the connection between the continents, countries, cultures, traditions, and pre-Christian religions and experiences

of the presenters and those they represented. There were three new papers, all from women's perspective, which enriched the content of the findings of the consultation. There was a wide cross-section of scholars, in addition to Andrew Walls and Mary Bediako, who participated in the consultations including Dr. Kabiro Wa Gatumu [Kenya], Dr. Deji Ayegboym [Nigeria], Dr. Lal-sangkima Pachuau [India], Dr. J. Kwabena Asamoah-Gyadu [Ghana], Dr. Tetteh Laryea [Ghana], Dr. Pascal Fossouo [Cameroon], Dr. Sam Tshehla [South Africa], Dr. Marcelo Vargas [Bolivia], Dr. Tito Paredes [Peru], Dr. Melba Padilla Maggay [Philippines], Dr. Featunai Liuaana [Samoa], and three new faces Dr. Dorcus Akintunde [Nigeria], Ms Ingrid Reneau [Beliz], and Ms Irma Espinoza [Peru]. The papers discussed a wide range of issues from translation problems with the bible in the local languages, to hermeneutics and theological issues regarding primal concepts within Christian theology, and the increasing movements back to primal beliefs and experiences as a way of refocusing and re-experiencing God in Jesus Christ in the local churches today. The aim of the consultation is to eventually publish a book by 2010 and that would be the focus of the next two consultations which would be held in Peru [2009] and Malua Theological College, Samoa, in 2010.

Rev Dr. Featunai Liuaana



**Ghana Women taking food for
offerings**

MEAALOFA A LE VASEGA FAAIUASO 2008: PALAU MOA VAO

O tausaga taitasi uma lava talu ona faavae mai le tauvaga faamatagofie aai a le Ofisa o Turisi poo le Matagaluega o e Malaga Tafafao mai fafo, e lei misi lava le faamanuiaina o Malua i faailoga taulia. E mafua lea ona o le tasi lava lenei o galuega faifaiepa a le Kolisi o le faamamaina ma faamatagofieina o lona lumafale faapea totonu ma tua o le aai. Masalo o le faavae lea o le ae o se manatu i le vasega faaiuasos o lenei tausaga e tuuina mai mo le Kolisi sa latou meaalofo e ala i se palau moa vao. Ina ia avea ma fesoasoani i lenei galuega faifaiepa a le Kolisi.

O le Aso Tofi, Aso 25 Setema, na tuuina aloaia mai ai lenei meaalofo. O le susuga ia Okesaita losia, o le taitaifono o lenei vasega na fai ma o



Okesaita losia , Otele Perelini ma Featunai Liuaana



Esekia Peneueta ile faataitaiga o le moa fou

latou sui e tauaaina aloaia le meaalofo i le susuga i le Alii Pule. O le susuga ia Featunai Liuaana (sui pule) na fai ma sui o le Kolisi e faaleoina le agaga faafetai mo lenei meaalofo taua. Na faapoopo le susuga ia Otele Perelini (pule) ma faapea ona molimoli ai ma faamanuiaga mo le vasega faaiuasos 2008. Na faapea foi ona ki ma faaolaina lenei moa vao ma faataitai lona faaogaina ao matamata ma molimauina e le Kolisi atoa. O lenei palau moa vao na faatauina mai i Aukilani, Niu Sila i le tau pe a ma le

\$14,000 Tala Samoa. E ui ina e le o se masini matua lapoa tele ae ua faailoa mai e le vasega faaiuasos o se masani anagata ma le malosi tele. Masalo e feagai tonu ma le igoa o le vaa foi lea o le "Laititi ae maini." E talitonu lava le manatu o le a tele sona aoga e fesoasoani ai i le faamamaina o le malae taalo faapea tafafale o le Kolisi. Ae masalo o lona tino mai lea na mafua ai le saunoaga a le Alii Pule na o le tasi lava le tulafono o le moa fou e tatau ona tausisia. Na o aoao tino mama e mafai ona faaogaina lenei masini aoga.

SUIA LE AFI ELETISE A LE KOLISI

Ona o le tulai mai pea o le faafitauli tau eletise, o lea na ae ai se tofa i le susuga i le alii pule ma le kolisi, ua tatau ona faatauina mai se afi eletise ina ia mafai pea ona faaolaina le faletusi, fale mafutaga aemaise o le fale lupeli i soo se taimi e pe ai le eletise. O le aso 12 Novema na faataunuuna ai lea faamoemoe, i le tau pe tusa ma le \$20,000, ma o seleni lava a le kolisi na faatupeina ai lea faamoemoe taua, ina ia sologa lelei pea galuega a le kolisi i soo se taimi e faaletonu mai ai le eletise.



Featunai Liuaana, Sesera Tolovaa ma le afi tuai



O nisi o a'oa'o ma le afi fou

RIPOTI MAFUTAGA A'OA'O 2008

O sina ripoti puupuu lenei o le mafutaga a a'oa'o i lenei tausaga 2008. E mafai ona faamatalaina o se mafutaga fiafia ma le feoeoea'i. E galulue faatasi i le faatinoina o tiute aemaise o galuega ua finagalo le Susuga i le Alii Pule mo le lelei o le Kolisi. O a'oa'o lava na mua i malae o i latou ia e faatonutonu ma fasoa atu foi lo latou iloa i nisi o uso a'oa'o faatoa ulufale mai. E faigofie le tele o polokalame i totonu o le Kolisi e pei o pese, taaloga ma galuega ona e fai le tauvalaauga. E molimauina e tulaga ese foi lenei tausaga i le sagisagi fiafia o le mafutaga a a'oa'o i le faatinoina o tiute. O se fiafiaga lea i le laulau i le fesoasoani mai, ua faigofie le ma galuega i le agaga mai. E avea ai



Niu, Fuifui, Ireneo, Anitoni, Olive, Kilepoa, Tupou, Tanielu, Setefano

lenei avanoa e momoli atu ai le faafetai tele a le laulau i le Susuga i le Alii Pule ma le mamalu o le aiga faiaoga i lo outou lagolagosua mai ua iu ai ma le manuia faiva o lenei

tausaga. O le faafetai faapitoa e faasino lea i a'oa'o taitasi uma o le Kolisi i lo outou fesoasoani malosi e tauamo le tatou avega. E leai lava se mea ma te mafaia pe ana le seanoa ma outou uma. Ia viia le Atua i mea uma ua mafai ona tatou faatino i lenei tausaga.

O le ma tatalo ia faamanuia le Atua i lo outou soifua taumafai i le aga atu i le tausaga fou.

Ia outou maua se Kerisimasi fiafia ma se Tausaga Fou manuia i le alofa ma le agalelei o le Atua.

Soifua:

Esekia Peneueta (Peresetene)
Tiafaafo Gatoloai (Failautusi)

RIPOTI AOGA ASO SA



Pesepesega o le Kerisimasi—Aoga Aso Sa

Ou te faatalofa atu i le paia ma le mamalu o paaga ma uo masani a le Maluapapa i lenei vaitau o le tausaga, le mamalu o le au-faigaluega paia a le Atua, malo le folau, malo le soifua manuia.

I lou ava tele, ua ou saunia ai lenei ripoti o le Aoga Aso Sa, 2008 i Malua nei. O le mea moni ua itiiti upu i mala ae tele upu i manu, o le viiga i le Atua ua agiagi pea i totonu o le Aoga Aso Sa, aua o le mea moni, e tele faalavelave na aafia ai fanau a Samoa, tele foi faamai na oo mai i fanau i Malua nei. Peitai o le viiga i le Atua, ona ua leai lava se ola o maumau ai. Ia tatou viia pea lona suafa e faavavau.

Na amata le aoga Aso Sa ia Fepuari 17, 2008, e toa 110 tamaiti e oo mai i le taimi nei, ua faaopopo le toa 7, o

ia tamaiti ua atoa le tai 3 tausaga ao nisi, o fanau lava a aoao sa i tua i aiga ae ua aumai, ona o faamanuiaga e maua e fanau i totonu o lenei aai.

I le gasologa o feau ma galuega Faa-Faiaoga-Aso Sa, o le mea moni e le faigofie, o le mea lea, e le itiiti ai le agaga faafetai i faletua o faiaoga, o e sa tuu mai o latou tauau, e tatou te tausoa faatasi le avega, o la outou tuu-a-lalo, ua mama ai le galuega.

Ae avea ia lenei avanoa taua, e fai ai au ma sui o faiaoga-Aso Sa o lenei tausaga, e momoli atu ai le agaga faafetai i lau susuga i le Alii Pule, Lau Susuga Otele Perelini, e tusa ai ma ou sao taua, mo le tapenaina o i matou mo feau ma Aoga Faa-faiaoga Aso Sa. O lou oa faa-le-agaga, ua e sasaa mai, ua matou tamaoiga ai, o lau tofa fa'amalie gata, na

e mamanuina ai lo matou ola taumafai, ua ae ai ma le manuia faiva ma tiute o lenei tausaga. Ia saga faamānuina pea le suafa o le Atua ona o galuega lelei ua mafai ona faatinoina. Ao le matou tatalo, o ni o matou faaletonu ma ni sese i le tatou mafutaga faa-faiaoga Aso Sa, ia e matua atu i ina. Ae to mai au faamanuiaga matou te o ma matou.

O seleni lava a le fanau na lafaina i Aso Sa taitasi, ua faatinoina ai la latou laau kerisimasi. E momoli atu ai le faamalo i matua e tusa ma la outou lagolago mai. Ia manuia tele le Kerisimasi ma le Tausaga Fou,

Soifua ona o Iesu,

Koria Matamū [Failautusi Aoga Aso Sa – Kuata 3]



Litia, Leti, Tumanu

RIPOTI O TAALOGA MAFUTAGA A'OA'O

I le faaauauina o taaloga a le mafutaga a a'oa'o i le afa lona lua o le tausaga, sa toe fetu'utu'unai ai au taaalo a le Black ma le White. Ua mafua lea tulaga ona ua atagia lava i faaiuga o taaloga i aso Tofi taitasi le vaivai tele o le finau a le White. E le gata i le soccer ma le touch rugby, ae ua taofiofi gatā foi le forwards a le Black i taimi e fepa'ia'i ai i le lakapi. O lea la na a'e ai se tofa i le Susuga i le Taitai Komiti, Susuga i le faiaoga ia Ma'afala Lima, se'i toe taumafai le White i se tulaga e mafai ai ona finau ma manumalo. O le fesuiaiga la lenei ua tula'i mai ai, o se tausaga ese lenei i le faaiuga o taaloga ina ua tutusa au e lua i le faaiuga o taaloga. O lea e momoli ai le faamalo i Susuga i Faiaoga, ta'ita'i, faapea le au a le White, ona ua ausia lea matati'a fou, talu le fesoasoani a sui o le Black sa ofo mai e suia a latou konekarate i le ogatotonu o le season. E ui ina e le'i faigo-fie ona ua mafana le mafutaga ma le Black, aemaise o se seleni tele sa faaaluina e atina'e ai la latou taleni. Peitai, ua faafiafiaina foi le Susuga i le Taitai Komiti, faapea Susuga i faiaoga, aemaise o le Komiti o Taaloga. Sa o'o lava i se tulaga ua faaletonu ai ma le attendance a le White pe a o'o ina folafola se laumoli i aso Tofi. Ua faamalo le finau. Faamalo le tauivi i au e lua. O le aso taalo mulimuli a le mafutaga sa faia

ai le soccer ma le touch, ae faaiu i afeleti i le va o vasega taitasi. I le iuga o lea tournament, na tula'i mai le manumalo aoao o le Tausaga Fa, e leai se faiaina i le tournament atoa. Sa matauina e le komiti le atoatoa pea o le malosi o le manava, aemaise lava i tuuga mamao. Ua atagia i le fa'aiuga o lea aso, e lei tu'umāmāina e le Tausaga Fa le tuua o le mafutaga, e ui lava ina sa lagona pea le i'uleo mai vasega uma e tolu ao faagasolo taaloga, "se'i tautuana le va fealoai." Sa faaiuina lea polokalame i saunoaga faalaeiau a le Susuga i le Taitai Komiti, aemaise o Susuga i Faiaoga, faapea le faamanuia mo le Tausaga Fa, i le tuua ai o le laumua. Ona alo loa lea i le vai inu ma le aisa kulimi sa saunia e le Tausaga Lua e faaiuina ai foi la latou matafaioi tauave. Talu ai nisi o tuatuagia, aemaise le faaletonu tele o le tau, sa le mafai ai ona toe faaauauina taaloga kilikiti i le vaega mulimuli o le tausaga. O lona uiga, e foliga mai ua sola filemu lava le Blue ma le talita o le 2008. Faamalo i le susuga i le Kapeteni, faapea le au atoa a le Blue. Ua talia lava a outou talosaga ina ia timu pea aso Tofi. E faamalo foi le Yellow, Red ma le Green, ia toe finau mai pea i lea tausaga. I lona aotelega, e talitonu le Komiti o Taaloga, ua faaiuina ma le manuia le polokalame a le mafutaga i

lenei tausaga. E ao ai pea ona momoli le agaga faafetai, ma le faamalosia i le susuga i le Taitai Komiti, faapea susuga i Faiaoga, ua mafua ai ona faataunuina i le manuia le faamoemoe o taaloga i lenei tausaga. Faamalo foi i ta'ita'i ma au taitasi, ona o le agaga finau, ma la outou lagolago mai i se taumafaiga vaivai a le Komiti o Taaloga i lenei tausaga. E faamalūlū atu ai foi le Komiti, pe afai na iai ni faaletonu i le tauaveina o ona tiute. Talitonu sa faatautaia lava polokalame uma i le malosi e gata mai ai, i le naunautai-ga ina ia sologa lelei mea uma, ae viia ai le Atua. E avea foi lenei avanoa taua e momoli atu ai faamanuia o le Kerisimasi ma le Tausaga Fou i lau Susuga i le Alii Pule ma le Aiga, Susuga i le Taitai Komiti, faapea susuga i Faiaoga ma o outou Auaiga, aemaise o le mafutaga atoa, o e o le a toe talia mai, e faaauau la tatou polokalame taaalo i le 2009. Ia faamanuia foi le Atua i e o le a tula'i mai, e tauave tofiga o le polokalame taalo i le 2009! Ia alofagia foi e le Atua le Komiti, i le taape atu, ma le galuega tele o loo faatalitali mai! Manuia tele le Kerisimasi ma le Tausaga Fou!

Komiti o Taaloga 2008 (Charles
Fidow, Faaesea Liu, Faraimo Ti'iti'i,
Olive Samuelu)



Esekia, Asofiafia, Tracy,
Tiafaafo (Laulau 2008)

RIPOTI FALETUA 2008

O se lipoti lenei o le mafutaga a faletua i lenei tausaga 2008. E ono sefulu le aofai o faletua o a'oa'o ma i lona vaeveaga, e toa sefulu lima le aofai o faletua o vasega taitasi, e amata mai i le Tausaga Muamua seia oo i le Tausaga Fa. I lenei tausaga ma le feagai o faletua ma tiute i totonu o le Kolisi, sa vaevaeina uma faletua i kulupu (groups) taitasi i lalo o le faamalumaluga a le faletua o le Alii Pule. E ono kulupu e pei o le Kindy, Home, Church, Dining, Hall ma le Library ma o vaega ia e galulue ai faletua i le feagai ai ma feau ma galuega i aso taitasi ma e taitaia e faletua o faiaoga faapea faaiuso. Ia ae le gata i lea, ao galuega faitele a le mafutaga e pei o le faamamaina o le vao, ia e feagai pea ma le laulau. E faatinoina foi

lana polokalame taalo i aso Tofi taitasi aua le faamalositi tino. I lenei vaitaimi ua le o toe i ai lava ni polokalame mea taulima ona ua ave lava le faamamafa ma le faamua-mua i la latou aoga Bible School ma e le taofia i latou o e fia galulue pea i le faiga o elei, taga solovae ma isi mea i o latou taimi paganoa. E tula-ga ese ai foi lenei tausaga i le mafutaga a faletua ma le feagai ai ma feau ma tiute. E faigofie ma lelei polokalame i totonu o le Kolisi ona o le galulue ma fai mea fiafia tagata uma. O se fiafiaga foi lea i le laulau ona o le fegalegaleai ma le galulue faatasi.

E avea ai foi lenei avanoa taua e faafetai tele atu ai i lau Susuga i le Alii Pule ma le Faletua faapea le mamalu o le aiga Faiaoga ona o la

outou faamalositi ma le lagolagosua mai ua manuia ai feau ma galuega o lenei tausaga. Faafetai i le mafutaga a faletua i ona itu uma ona ua mama ma faigofie la ma galuega o loo faia ona o la outou fesoasoani mai. A tatou uma ona faia o se mea ia tatou faapea ane, o auauna le aoga lava i tatou a ia ave le viiga i le Atua o le e ona le malositi uma lava. O le ma tatalo ia faamanuia le Atua i lo outou soifua taumafai i le tausaga fou. Ia manuia tele le Kerisimasi ma le Tausaga Fou i le alofa ma le agalelei o le Tama oi le lagi.

Soifua:

Asafia Peneueta (Peresetene)
Tracy Gatoloai (Failautusi).

RIPOTI O TAALOGA FALETUA

O le viiga lava ma le faafetai i le Atua, ina ua faataunuuna foi i le manuia taaloga a i matou faletua i lenei tausaga 2008. Aua e ui i le pisi ma le tele foi o polokalame faa faletua i totonu o le Kolisi, ae le mafai ai foi ona tuua le faamalositi tino i Aso Tofi taitasi.

E 4 'au na vaevaeina iai faletua, ole BLUE, GREY, PURPLE ma le GREEN. Sa vaevaeina tai 18 faletua i le au, o loo aofia ai ma faletua o faiaoga e taitoa fa i le 'au. Sa faamaumauina iuga o taaloga i vaiaso taitasi, mai ia Fepuari seia oo mai i le masina nei o Novema. O taitai o au taitasi, o nisi faletua faaiuso. O i latou ia na gafa ma le tofiga o a latou au, ma faufautua mo uiga faaalua ma tula-fono. O le taitai o le Blue o Sose Filivaa, Grey o Puataunofo Matamu, Purple o Faalua Malota ma le Green sa matou faafeagai.

O le tele o Aso Tofi taitasi sa na o le voli polo sa taaalo ai faletua, ae o le Aso Tofi mulimuli 13 o Novema, na faia ai a matou afeleti ae faaiu i le matou siva i le po. O se aso fiafia ma malie, ina ua toe vaaia teine ua tamomoe i le malae i taufetuliga, tuuga-tagā, moligafua aemaise le taimi o tuuga 'ai. Na faaiu i la matou po siva ma tufatufa ai faailoga o le tausaga atoa.

FAAILOGA [prizes]

1. TEINE TAALO OLE TAUSAGA – Amata Mulitalo. [blue]
2. TAALO TAUSAAFA – Makerita Kamuta. [green]
3. TAALO ALUALU I LUMA – Maria Samuelu [blue]
4. FAI LAPE MALIE – Vaaufiao Lelevaga [blue]
5. 'AU MANUMALO OLE TAUSAGA – Green.

I lea lava po fiafia, na vaaia ai le malie o saasaa a faletua i nai a latou siva ua leva ona nana, aemaise i le taimi o le siva pe. O nisi e pei e aau, o nisi e pei e toli popo, o nisi e pei e saeu kaleve, ao le toa tele e pei ua toe kaukalake mai le au Saina.

Na faaiuina i le saunoaga mulimuli a le faletua o le Sui Pule Perise

Liuaana, i lana faafetai mo le polokalame taalo o lenei tausaga, ma lana faamanuia mo le mafutaga i fuafuaga uma o le lumanai.

Avea foi lenei itula ou te faafetai atu ai i le mafutaga aoao mo le lava papale ma usitaia fuafuaga uma sa faafoe ai a tatou taaloga. Aemaise foi faletua o faiaoga ia Salataima Futi ma Tauvela Sua o e na fesoasoani malositi i la matou komiti. Faafetai foi i faletua o faaiuso i le lagolagosua mai ua matagofie ma taunuu ai mea uma i le manuia. *PE A UMA ONA TATOU FAIA O SE MEA, ONA TATOU FAAPEA ANE LEA – 'O AUAUNA LE AOGA LAVA I MATOU' IA MANUIA LAVA LE KERISIMASI MA LE TAUSAGA FOU.*

Soifua

Tineimala Fidow.



**Faletua o
Faaiuso**

**Puataunofo
Faalua
Feula
Asafia
Maria**

INITIA 2008: POLOKALAME "FACE TO FACE" A LE C.W.M

O lenei polokalame sa faataunuina i le lunivesite o le 'United Theological College' i Bangalore, Initia mai le aso 4 o Aokuso i le aso 24 o Setema 2008.

O le autu ia vaaitino i faafitauli o feagai ma le lotu kerisiano i Initia, atoa ma ni fesoasoani o mafai ona ofoina atu iai e le lalolagi faapea tagata Initia lava latou.

O nisi nei o faafitauli sa matauina.

1. O le faailoga tagata e mafua mai i le Caste System po o le faavasegaina o tagata i tulagatofi i totonu o le atunuu. O se faavasegaina lea ua pito ai i lalo ma le amanaiaina ai le au matitiva ma le au le tagolima.

2. O le tele o le mativa ona o le tuputupu pea o le faitau aofai o tagata o le atunuu. I le taimi nei ua 1.2 pilliona le faitau aofai o Initia. O nei tagata matitiva e leai ni fanua, leai ni galuega ma ni mea ai. Ao tagata matitiva nei ua maua uma ai le aofai o tagata kerisiano e 2.5% o le faitau aofai o tagata Initia. (pe a ma le 26 miliona)

O le teena pea e isi lotu tetele i

totonu o Initia pei o Hinitu ma le Moselemi, o le lotu Kerisiano, ma sauaina ai tagata matitiva. O mafuaaga fai mai leaga o le lotu mai fafo, e le o se lotu Initia.

Peitai ua vaaia foi le taua ma le aoga o galuega a Misionare, amata mai lava ia Toma le soo o Iesu i le tausaga 52 AD. E faapea foi le fua mai o galuega a Misionare Peretania e ala i aoga, falemai, falesa, nofoaga sulufai ma isi galuega lelei. O molimau ia ma pine faamau o le ola o le lotu Kerisiano e oo mai lava i ona po nei.

O se tasi itu taua ua amata ona malamalama le au matitiva ma ua faamuamua fanau i aoga, ina ua iloa le leaga o le ola mativa.

O se aoaoga lelei foi ina ua taulamua lava nisi fanau a e matitiva ua iu mai fafo ma faailoga maua-luluga, i galuega laveai/fesoasoani mo tagata matitiva lava. O le lunivesite foi, (UTC) ua faafoeina lava e fanau a le au matitiva; o e ua maua faailoga Polofesa, Fomai, Masters ma Bachelors.

O se laasaga lelei ma le taua na matauina, ina ua vaaia le galueina pea e le mana o le Atua le lotu Kerisiano i totonu o Initia, e ui i le tele o faafitauli. O le tele o tagata ua tu lelei ma maua luga i le Malo ma le Ekalesia, na aooga uma lava i aoga nei a le Ekalesia (Misionare).

O se fiafiaga i tagata linitia ina ua matou lauga atu, e tutusa o tatou talitonuga ia Iesu Keriso, ma lona alofa lava lea o tausua uma ai tatou. O se avanoa taua lenei ua aoaoina ai i le malosi o le faatua-tua mai mea faigata o le olaga.

E faafetaia ai le ofisa o le CWM i Peretania faapea le Ekalesia Faapotopotoga Kerisiano Samoa e ala i lana Komiti faa-Misionare ona o nei avanoa lelei ua maua ai ni aoaoga taua. E moni lava "E lotolotoi lava le Atua i o tatou tagata, i soo se vaega o le olaga o tatou iai".

Soifua

Falefa Leauma

Malua

AOGA TUSI PAIA I MALUA

O le viiga o le Atua Tolutasi Paia e alagaina pea e lana fanau faatua-tua, aua o lea ua tatou taunuu mai i le siui o galuega o lenei tausaga faaleaoaoga ona o le aao laveai o lo tatou Tapaau i le lagi ma le faatonutonu folau o lona Agaga i feau sa lavasi. O se avanoa foi lea e faamalo atu ai i le tapuaiga a le Ekalesia i ona vaega eseese ao feagai ai le Pule (Rev Professor Otele Perelini) ma le tatou Kolisi Faafaifeau ma le faafoeina o le Aoga Tusi Paia.

O lea ua maea le Semester lona 3 o le Aoga Tusi Paia talu ona faavaeina, ina ua uma ana suega sa faia ia Novema 3 - Novema 10. O lenei Semester e 10 ni mataupu sa aoaoina ai, o le faafoeina sa feagai lava ma faiaoga o

le Kolisi. O se fiafiaga tele le matauina pea o le fiafia o i latou o lo o auai mai i lenei aoga, ua faaalua lea i le faaopopoina pea o i latou e resitalaina e pei foi o le semester na se'i faatoa maea atu. O nisi sa iai i le amataina o lenei aoga ua maea mataupu faatula-gaina mo le Certificate ae ua faaaauu atu pea i le faamaeaina o a latou Diploma. I lona aoaotetele la, o lo o manuia galuega faatino a le Aoga Tusi Paia. Tatou tatolo pea ina ia gasolo lelei pea lenei faalepo a le Ekalesia aua lava le faatamaoiaaina o ona tagata lautele i mataupu tau le Atua. Ia foaiina foi e le Atua o manatu ma mafaufauga e saga faaleleia atili ai lenei auaunaga aua lava le faateleina o lona viiga.

Ia saga faamanuia le Atua i faletua o le Tausaga faaiuso o le 2008, o i latou sa avea ma totino o lenei aoga. Ia avea ma oso lelei i mea o le a faaaoaoga ai le soifua aoaoga sa faia i totonu o le Aoga Tusi Paia. O le agaga lava lea e tasi i le mamalu o le atunuu ma le Ekalesia o lo o aoaoina i lenei aoga. E faamanuia atu ai le kerisimasi i sui uma o le Aoga Tusi Paia. Faapea foi ona faamanuia atu le Aoga Tusi Paia i le Ekalesia i le faaiuga o lenei tausaga, tau ina ia taitaiina le soifua ina ia maua ai se Kerisimasi fiafia ma ia taitaiina atu ia aulia le tausaga fou 2009 i le filemu o le Atua. Tatou toe feiloai ai i le faaaauuina o le tatou aoga i lona tausaga i le alofa o le Atua.

VALAAUINA SESERA TOLOVAA & LITARA E LE EKALESIA A BLOCKHOUSE BAY

O le maea ai o feau ma galuega a le Kolisi Faafaifeau i Malua i lenei tausaga, e faapea ai foi ona maea ai le tautua faafaiaoga a le susuga a Sesera Tolovaa ma le faletua ia Litara. Ua valaauina i laua e le ekalesia a Blockhouse Bay i Aukilani Niu Sila e avea ma a latou faifeau. O le ekalesia sa taitaina e le Toeaina ia Poasa Talalelei ua maliu. O loo iai le faamoemoe e osia le feagaiga a i laua ma le aulotu i le vaiaso muamua o Fepuari, 2009.

O le susuga a Sesera o se faiaoga sinia o le Matagaluega a le Ministry, o loo feagai ma le aoaoina o le galuega faafaifeau ma aoaoga faakerisiano. Na amata lana auau-naga i le Kolisi Faafaifeau i Malua i le tausaga e 1999. O lona uiga ua sefulu ai nei tausaga o galulue i laua i Malua nei. O le susuga a Tolovaa e tele isi ona tiute e ese mai i le faiaoga na faaaogaina ai le tele o ana taleni ma agavaa. O ia na avea ma se tasi o taitai i le Mataupu Silisili Faalautele sa feagai ma le Kolisi i nai tausaga ua mavae e le o mamao tele atu. E le gata i lea, o loo avea foi ma taitai o le vaega o loo vaaia le sologa lelei o le suavai taumafa i totonu o le aai. O lalo foi o lana taitaiga, o le vaega o loo feagai ma le itu e vaaia le soifua maloloina o le aai mai iniseti ma manu faalafua. Ao ia foi o se sui taua ma



Tolova'a Family - Sesera, Vanera, Lawrence, Litara, Siimoa

le faamoemoeina a le kalapu tapolo a Malua. O le faletua ia Litara o loo galue i le Faletusi a le Kolisi. O ia foi o se faiaoga Aso Sa o loo fesoasoani tele i Aoa ma Faletua o loo agai atu i lea tiute taua mai lea tausaga ma lea tausaga.

O le a misia tele e le Alii Pule ma le Kolisi nei auauna aoga ma le tusaafia. Ia tau ina ia faamanuia tele le Atua i le galuega o le a feagai ai i le lumanai.

RIPOTI AUTALAVOU LAITI

Muamua lava ona faafoi le viiga ma le faafetai i le Atua, ona o lona alofa ma lona agalelei ua tatou aulia ai lenei vaega o le tausaga. O feau ma galuega sa feagai ai lea ua tatou taunuu i le faaiuga o lenei foi tausaga ona o le taitaiga alofa a le Atua i lo outou soifua ma lo matou ola.

Ae o se tala pu'upu'u lenei e faasino i galuega fai sa feagai ai ma le Malua Junior Youth i lenei tausaga. E muamua ona fia faailoa atu le aofai o tama ma teine o le Malua Junior Youth faapea foi susuga i taitai ua filifilia e faatino lenei itutino taua o polokalame a le Kolisi Faafaifeau i Malua. O le aofai o tama ma teine o le Autalavou Laiti e 20, e 11 tama ma e toa 9 teine e aofia ai alo ma fanau a faiaoga faapea foi ma aoao. O le aofai o taitai e toa 9 ua filifilia mai i aoao ma faletua tausaga muamua seia oo i le

tausaga tolu.

E tele polokalame sa faatino i lenei tausaga. O nisi nei o polokalame sa faatino i afiafi o Aso Toonai mai le 7-9pm; o le aoga Tusi Paia (bible studies), o finauga faale-mafaufau (debates), faaaliga taleni (talent quest), suesuega ma tauiviga i mataupu o le Tusi Paia ma suesuega i nei ona po (bible quiz and general knowledge). Sa talanoaina foi mataupu e ono aafia ai tupulaga talavou i nei ona po e pei o le ava malosi, o fualaau faasaina, o aiatatau a tamaiti, o le taua o aoaoga faale-mafaufau mo se lumanai manuia ma le tele o isi mataupu. O le faamoemoe o lenei fetufaiga ina ia faailoa, ia malamalama, ma tapenapena ai tama ma teine o lenei mafutaga mo luitau o le olaga. Ae le gata i lea, o le faasoa mai o fanau o se fesoasoani tele lea mo taitai ina ua toe maua ni mafaufauga fou, e toe

fuataina ai ma sailiili pea i aoaoga fou aua se manuia o le galuega faale-autalavou.

E le gata i polokalame ua taua, ae o loo faatino pea polokalame masani o le Aso Maliu, Aso Sa o le lotu tamaiti ma le tala o le kirisimasi e pei ona feagai ai le Aoga Aso Sa ma le Autalavou Laiti i lenei foi vaitau o le tausaga.

E avea foi lenei avanoa e momoli atu ai le faafetai tele i le susuga i le Ali'i Pule e tusa ai ma le fesoasoani malosi i a matou faamoemoega uma, faapea foi i susuga i faiaoga ma matua i lo latou lagolagosua i polokalame a le Autalavou Laiti i lenei tausaga.

Ia manuia lava le Kerisimasi ma le Tausaga fou.

Sam Amosa

MAFUTA LE KOLISI MA LE SUSUGA IA OKA FAUOLO

O le Aso Sa, 9 o Novema na faapea ona taitaiina ai e le susuga i le Toeaina ia Oka Fauolo le sauniga lotu taeao a le Kolisi Faafaifeau i Malua. O le taunuuga o se valaau faapitoa a le Alii Pule ma le ekalesia i Malua mo le susuga a Fauolo. Aua e pei ona silafia, o le susuga a Oka Fauolo sa avea ma Pule o Malua i le tele o tausaga ua mavae. Ma o le taimi muamua lena ua valaau faapitoa ai o ia mo se mafutaga faapea talu ona maea lona avea ai ma pule. E tulaga ese foi lea taeao aemaise o le toatele o le Kolisi i nisi o faiaoga, aoao ma faletua. Aua ua na o se toaititi o faiaoga o iai nei sa faapea ona aoga ma galulue foi i lalo o le taitaiga a le Toeaina. Mo le

toatele lava la o se avanoa le aumaua lena e mafuta ma faalogologo ai i se faalaeiau faaleagaga a le susuga ia Oka Fauolo. O le faalaeiau a le Toeaina na faavae i le tusi o Mataio 24:29-35. O le faamamafa o le taua o le faagaetia e le Agaga o le Atua e faatino ai le soifua valaauina. O se feau faamalosiua ma le aoga ua fetautonu ma le ekalesia i Malua. E le gata i le aufaigaluega galulue ae faapea ai i aoao ma faletua o loo faalioli mo le galulue ai i aulotu ma ekalesia i le lumanai.

Na maea le sauniga lotu ona faaaau ai lava lea o le mafutaga fiafia i le toonai i le Fale Senetenari. Na faaalia le agaga fiafia o le Alii

Pule ma le aulotu i faaaloaloga masani faapea se meaaloa faatauva mo le Toeaina ma le faletua ia Sooletau na auai i lea aso. O le susuga i le sui pule o le Kolisi, Featunai Liuaana na avea ma fofoga o le aso na molimolia le agaga faafetai i le tofi ona o le talia fiafia o lena valaau. Na faapea foi ona tali fuaitau le susuga i le Toeaina ma faaleoina lana faafetai aemaise o ana faamanuiaga mo le Alii Pule faapea le aulotu i Malua ona o mea uma ua faatinoina. Na faaiuina ma le fiafia lena mafutaga i le tatalo ma faapea ai lona ona lulu aao ma faatofa.

RIPOTI A LE MALUA KINDY

E amata le kuata, o 25 tamaiti. Faaopoopo tamaiti e tolu ina ua atoa le tai 3 tausaga ona maua ai lea o tama e 17 ma teine e 10.

Faiaoga.

E toa iva faletua o aoao sa matou galulue i lalo o le faaululuga i le Susuga i le faletua ia Julie Perelini. O Maria Samuelu, Caroline Liu, Talalelei Niue, Epenesa Toleafoa, Luisa Tanielu, Teleolealoa Sio, Cynthia Faletagaloa, Paono Tofilau ma Toia Lauvi.

O Autu

O autu nei sa tasi i ai faiaoga ina ia aoaoina i lena kuata.
Vateatea – lua vaiaso
Fausaga eseese – lua vaiaso
Fualaau aina – tasi vaiaso
Faaaliga ma Faafiafaaga (circus) – lua vaiaso
Teuteuga o le Kirisimasi – lua vaiaso

O upu fou na aoaoina e tamaiti i le Autu lea o le Vateatea – o le pusaloa ma le aniva.
Sa faigofie lava ona malamalama tamaiti ona o le tele o ata sa matou faaagoaina aemaise ai foi le pese i le Vateatea o loo taua ai ia upu.

Ina ua matou oo i Fausaga Eeseese,

sa alu se matou tietiega e faamata-mata ai tamaiti i fausaga eseese – fale uati, fale fono, senetenari (fale samoa), fale logo, lupeli (falea), fale aoga (Leulumoega), fale e nonofo ai aiga, faleoloa, fale taalo ae sa faaoga ata mo isi ituaiga o fale e i ai falemai ma maota o Tupu.

Sa tele faatinoga i le vaiaso o le Fualaau Aina. Sa faatino i le faaogaina i le faiga o le sanuisi, salati ma le faaogaina i le supo. Sa faamamafa lava le taumafa mo le soifua maloloina.

O le Faaaliga ma Faafiafiaga na matua faigofie lava ona aoaoina ona sa faaoga metotia eseese e faiaoga e taumafai ai e faamalalama manino e tamaiti lea foi autu. Sa laei faiaoga i ofu a le faaluma ma fai uiga ma aga faafaaluma – faatino le uila pau tasi – o lola vavae ma popo koni lea e fiafia i ai le au matamata e taumafa ai aemaise ai foi o mea ola e faaoga i le faaaliga. Ao le vaega na matua fiafia i ai tamaiti o le valiina o latou foliga e pei o le faaluma.

Teuteuga o le Kirisimasi, o vaiaso ia o mea feilafi. E uma lava galuega faatino a tamaiti ma teuteu ai le potu aoga.

Taaloga

O nisi nei o taaloga e masani ona fai.

Kiki polo

Sueina o le Leona

Saposapo faataavale polo

Feula putaputa

A le faia ni taaloga ua fai loa le faamalosi tino i lalo le mago.

Tala Kerisimasi

O le vaiaso mulimuli lava i le aso 24/11/2008 na faia ai pesepesga a tamaiti ma tauloto. Faatino ai ma le tala i le fanau mai o Iesu. Sosoo ai ma le tufatufaina o tusi pasi ma mea alofa a tamaiti e Santa Claus. Sa fai le taumafataga mama mo matua faapea ma tamaiti ina ua maea.

E momoli atu le faafetai tele ia Tavita ma Lapiti i le faaleleia o nisi o tulaga i totonu o le pa taalo aua lava le saogalemu o fanau. E le faaititia foi le agaga faafetai i mamalu o faiaoga ma matua e tusa ai ma le lagolago mai i le galuega, ua manuia ai mea uma.

Ia manuia le Kerisimasi.

Faafetai lava

Asofiafia Peneueta

IA MOTU LE PA A UA ILOA...

SUI PULE MO LE FONOTAGA I GHANA

O lenei fonotaga o le faaaauaina o fonotaga faagasolo a le sosaiete o faiaoga o le mataupu silisili i itu tau tapuaiga anamua (primeval religion), lea sa muai faia i Amerika i le tausaga ua mavae. O nei fonotaga o le toe fafaguina mai o tapuaiga anamua a atunuu taitasi. O le manatu autu o lenei sutesuega, e i ai le sao taua o le silafia o nei tapuaiga anamua i le faamalamalama o tapuaiga a Isaraelu i aso o le Tusi Paia.

E lua vaiaso sa faatinoina ai lenei fonotaga. Na amata mai i le aso 13 – 24 o Oketopa. O le susuga ia Featunai Liuaana (sui pule) na fai ma sui o Malua i nei fonotaga sa faia i Ghana i Aferika.

E tusa ai ma le saunoaga a Liuaana, o se sutesuega e taua tele mo Malua aemaise Samoa. Aua e tele foi a tatou tapuaiga anamua e mafai ona tatou sutesueina ma faaaogaina ina ia malamalama atili ai i tapuaiga a Isaraelu e ala i se sutesuega faatusatusa (comparative study). Ao le faatinoina o nei sutesuega e mafai ai ona faalautele lo tatou iloa faamataupu silisili ma malamalama atili ai i le Tusi Paia.

Saunoa foi Liuaana, o loo iai le faamoemoe i se isi fonotaga e ono faia mai i Malua. Ma afai e taunuu lenei faatasiga o le a faapea loa ona faatuina i Malua se lala o lenei sosaiete e ogatotonu iai sutesuega faaletapuaiga anamua a lenei itulagi. O se matatia taua foi lenei i le talafaasolopito o le Kolisi i Malua pe a fai e taunuu nei faamoemoega lelei.

FAIAOGA FAAOPOPO MAI



O le masina o Aokuso, 2008 na faaopopo mai ai se sui fou o faiaoga Malua. O le susuga ia Alesana Palaamo ua faamaonia ma tofiaina e le Komiti o Malua e avea ma faiaoga i le Kolisi Faafaifeau i Malua. O le susuga ia Palaamo na iu ma Malua i le tausaga e 2006 ma lona faailoga o le Bachelor of Theology. Na faaaau lona taumafai i le lunivesite o Kampen i Holani ma faauina ai i le faailoga o le Master of Theology, 2008. Ua faiaoga nei o ia i le vaega o le Ministry o loo feagai ma le aoaoina o le galuega faafaifeau ma aoaoga faakerisiano. Ua faaipoipo o ia i le faletua ia Lemau ma e toatasi si o la alo, o Norman. O le susuga ia Alesana Palaamo e sau mai le Matagaluega a Niusauelese i Ausetalia.

SIKOLASIPI MAI LE KOLISI FAAFAIFEAU I VAILIMA A LE EKALESIA FAAPOTOPOTOGA A IESU I SAMOA

O se tasi foi lenei o tulaga ese i le talafaasolopito o le Kolisi Faafaifeau i Malua ina ua aoaoina ai ni sui mai le Kolisi Faafaifeau i Vailima. Aua o le tele lava o tausaga ua mavae na o sui mai Ekalesia o atumotu eseese o le Pasefika, e pei o Vanuatu, Tuvalu, Toelau, ma Niue na mafai ona aotauina i Malua. Ao nei sui na mafai ona taliaina ona o sootaga vavalatala ma le lelei o taitai o Ekalesia. O se agaga faapea foi lea ua mafua ai lenei feso'otaiga ma mafai ai ona aoaoina nei sui mai le Ekalesia Faalapopotoga a Iesu i Samoa. O i laua ia o Ionatana Te'o ma Motu Taufete'e. O nei aoao ua maea ona aoaoina i le Kolisi Faafaifeau i Vailima i ni nai tausaga. Ma ua faamauiina e i laua le agaga faafetai mo lenei avanoa taua ua o la mauaina. O nei aoao e lei faaipoipo uma i laua.

OLIVE SAMUEL MO LE AOGA FAAFAIFEAU I FITI



O le susuga a Olive Samuelu o ia lea o le sui o le vasega faaiuso o lenei tausaga, 2008 ua faamaonia lona avanoa faasikolasipi mo le aoga faafaifeau i Fiti. O le a aotauina ai i le faailoga o le Master of Theology i le mataupu silisili i tausaga e lua. O lea avanoa e amata i le tausaga 2009 i le masina o Fepuari. E malaga atu o ia ma le faletua ia Maria ma si o la alo o Erenei.

LAULAU FOU A LE MAFUTAGA AOAO MA FALETUA 2009

O le maea ai o suega faaii a le Kolisi i lenei tausaga i le Aso Tofi, 20 o Novema, na faataunuuina ai lava i lea po le filifiliga o se laulau fou mo le tausaga 2009. O ofisa e lua o le Peresetene ma le Failautusi e agavaa uma ai sui o le Tausaga Tolu e tauva ai. Ina ua maea le palota i lea po, ua filifilia ai loa le susuga i le Aoao ia Falefaosamanga Leaula ma le faletua ia Tualupetu i le tofi Peresetene, ao le susuga i le Aoao ia Fuifui Teevale ma le faletua ia Roberta e tauaveina le tofi Failautusi. O i latou la nei o le a suitulaga ia Esekia Peneueta ma Asofiafia (Peresetene) ma Tiafaafo Gatoloai ma Tracy (Failautusi) o e sa tauavea mai nei tofi i lenei foi tausaga 2008.

TUUFAATASIA I LE FAAIPOIPOGA

O le upu a ia a le Tusi e sili ona lelei o le toalua nai lo le toatasi. Ae sili atu pe afai o loo ofoina le ola mo le galuega a le Atua e ala i le galuega tala'i a le Ekalesia Faapotoopotoga Kerisiano Samoa. Aua foi, o le galuega faitoalua. E iai la le talitonuga o le atoaga foi lea o tapenapenaga a se aoao o loo sauni atu mo le galuega tele o loo faatalitali mai.

O le tuuaga a le Kolisi ia Aokuso na fai ma avanoa e molimauina ai aso fiafia o nisi o aoao faaiuso. O le susuga ia Sapati Tima na faaipoipo atu i le faletua ia Mayolandre Tagoilelagi. Na faapaiaina i laua i Aukilani, Niu Sila i le ekalesia i Otahuhu. Ao le susuga ia Faasea Liu na tuu faatasia ma le faletua ia Caroline Auvaa i le Ekalesia i Vaoala. Na molimauina e i latou na auai i nei aso fiafia le matagofie o tulaga uma. Aemaise lava foliga fiafia o ulugalii fou ina ua tau lau o le faamoemoe na faananau i ai.

FAALELEIA ATILI O LE VAI LAUMEI

O le tausaga nei na faatoa aloaia ai e le Matagaluega o Tagata Tafafao Maimoa Mai Fafo le tasi o mataaga o loo ofoina ma tausaiaina e le Kolisi Faafaifeau i Malua. O lana vai laumei lea e i luma tonu o le Fale lupeli ma le maota o le Sui Pule o le Kolisi. O lea talia aloaia na faatinoina i se meaalofo tupe na foaiina mo le Kolisi e fesoasoani i le faaleleia atili o lea mataaga.

O se tasi la o suiga fou ua iai nei, o le ala taavale faataamilo ua mafai ona uia e tagata fia maimoa i itu uma o le vai laumei. Aemaise lava i le maimoaina o laumei o loo fafagaina ma tausai e le Kolisi. O nei galuega ua siisii atili ai lava i luga le matagofie o le laumua i Malua nei.

FALE FAAFOU MO FAIAOGA A LE KOLISI

O le masina o Oketopa ao lumanai le lotu tamaiti, na faaiuina ai ma le manuia le galuega i le toe faafouina o se tasi o maota o loo nofoia e faiaoga o le kolisi, lea ei tua tonu lava o le fale setenari. Na faatupeina lea faamoemoe i le tupe e tusa ma le \$30,000 na tuuina mai e le Ekalesia aoao. O lenei galuega sa faatinoina lava e le au kamuta a le kolisi i lalo o le taitaiga a le Susuga ia Faatafa Nefu. E momoli foi le faafetai i le Ekalesia, ona o le seleni ua faamatuu mai mo lenei galuega, aua le faaleleia o maota, o loo alala ai susuga i faiaoga.



Foliga fiafia ina ua mae'a ona osia le feagaiga a Faasea ma Caroline i le Malumalu EFKS Vaoala

SUSUGA REV DR PENIAMINA VAI

"Aua na afio mai Iesu Keriso i le lalolagi i se ala maulalo, o le mea lea e faatasi ai pea o la ma e faatauva'a. E i ai o la faatasi ma tagata faatauva'a" (Rebecca Manley Pippert).

O le susuga ia Rev. Dr. Peniamina Vai na avea ma se tasi o faiaoga a le Kolisi Faafaifeau i Malua i le tausaga 1971-1974. Sa tele foi sona sao mo sikolasipi a le ekalesia sa aoga i le Pacific Theological College i Fiti, aemaise o alo ma fanau sikolasipi a le atunuu i le lunivesite o le Pasefika i Fiti. O Aperila 17, 2008, na faamanavaina ai ana galuega e le Atua.

O Rev. Dr. Peniamina Vai na soifua mai i le aso 30 Me 1943. O le 21 o ona tausaga na ulufale ai i le Kolisi Faafaifeau i Malua mai le tausaga 1964 i le 1967. Na faalauteleina lona taumafai mo le faailoga o le Bachelor of Divinity i le Pacific Theological College i Fiti i le tausaga 1968-1970. Na toe faalauteleina lona taumafai mo le Doctor of Ministry i Columbia Theological Seminary i Atlanta Georgia Amerika i le tausaga 1992-1993.

O le tausaga 1972 na faauuina ai Peniamina Vai ma le faletua o Rosa mo le galuega a le Atua. O le tausaga 1974 na valaauina ai i laua e



Susuga Peni Vai ma le faletua ia Rosa

galulue faafaifeau mo le ekalesia EFKS Pagopago i Amerika Samoa mo le umi e ono tausaga. Na toe malaga mai i Upolu ma faiaoga ai i

le Kolisi o Leulumoega i le 1981-1982. O le tausaga 1983 na malaga atu ai ma le aiga i Jamaica ma galulue faamisionare i le Ekalesia United Church (United Church in Jamaica and Cayman Islands). Na malaga i Fiti ma faiaoga ai i le Pacific Theological College i le 1994-2000 ina ua faaiuina le galuega na galulue ai i Jamaica. O le tausaga 2000 na valaauina ai e le ekalesia EFKS East Tamaki, Aukilani i Saute Niusila seia oo i le tausaga 2008 na faamanavaina ai ana galuega e le Atua.

I le masina o Novema 2005 na maua ai se tala faanoanoa mai le falemai i Aukilani Niusila ua aafia o ia i le gasegase tuga. E tele ni taumafaiga na faia i le falemai i Aukilani mo nisi o togafitiga ina ia malolo ai lona gasegase. Peitai ane ua finagalo lava lona Matai i le lagi ina ia malolo o ia mai i ana galuega. O toe aso o lona soifua o le mafutaga lava ma tagata e faasilisili i lona alofa o lana ekalesia, lona aiga, lona toaluva ma lana fanau.

"Afai e te ola ai i le soifuaga na soifua ai Iesu, e fai lana galuega faa-Talalelei ma soifuaga masani ia te oe a e le ose faatonuga" (R. M. Pippert).

O NAI VAAIGA I LE KOLISI 2008



MAFUTAGA FA'AFUINA 2008



O tuuaga lona lua lava i tausaga taitasi, e feagai ai le Kolisi Faafaifeau ma le faafoeina o le mafutaga faafouina a faifeau ma aoao tausuu, ma sa faataunuuna lea faamoemoe i le aso 25-28 Aokuso, 2008. E silia ma le 100 i latou na auai, e aofia ai sui mai matagaluega a Niu Sila, Ausetalia, Hawaii, Amerika, ae faapea foi nai o tatou uso mai Amerika Samoa. O le susuga i le Taitaifono a le komiti a le Au Toeina, Risatisone Ete na feagai ma le taitaiina o le mafutaga. Na i ai sina suiga i le mafutaga i lenei tausaga, ona sa i ai le manatu poo le sini autu e agai i ai manatu ma lagona faasoa o le mafutaga. O le manatu autu o le mafutaga, "O ai

lou tuaoi?" Na tatala aloaia le mafutaga i le sauniga lotu na saunia e le Pule o le Kolisi i le Aso Gafua i le itula e 7pm. O se mafutaga e tumu i le tamaoaiga i meaai faaletino ae faapea foi i meaai faaleagaga ona o aso uma lava, na saunia ai e susuga i faiaoga o le Kolisi ni pepa e faatalanoaina ma faasoa i ai manatu o le mafutaga, ma e agai uma nei faatalatalanoaga i le manatu autu. E lua ni tautalaga faapitoa na valaaulia e le mafutaga. O le tamaitai pule o le kamupani CSL na faasoa mai e uiga i le taua o le fesootaiga faatekenolosi, ma le Faletua ia Sooletaua Fauolo, na faasoa mai i le taua o le atinae o Aoga Faataitai i nuu ma ekalesia. E

ese le matagofie o le mafutaga ona o le tausisia lelei o taimi, e ala usu lava i le savali ma faamalositino i taeao uma lava, ona faagasolo ai lava lea o polokalame faatulagaina. O le Aso Tofi na feagai ai ma taaloga, o i latou lava e fialia i le taaloga tagapolo, na auai uma i le malae taalo i Faleolo, ao le toatele sa taaalo lava i le soka, lakapi ma le tenisi i totonu lava o le Kolisi. Na faaiu le mafutaga ma tapunia aloaia ai i le sauniga ma le faama-natuga na saunia e le taitai o le mafutaga i lea lava po. Na faaiuina ma le manuia le mafutaga i le faatasi mai o le Agaga o le Atua, na faigofie ai le faasoaina o manatu ma lagona, ma faafouina ai le mafutaga i lea tausaga ma lea tausaga.

O NAI VAAIGA I LE GASOLOGA O LE MAFUTAGA—O FETUFAAIGA I MEA TAU MATAUPU SILISILI FAAPEA FOI TAALOGA MO LE FAAMALOSITINO



Taimi o fetufaaiga i pepa



Taimi o Taaloga

MAFUTAGA SOSAIETE SUESUE I LE TUSI PAIA FAAVAOMALO 2008 (SOCIETY OF BIBLICAL LITERATURE INTERNATIONAL CONFERENCE 2008)

O le aso 6-11 Iulai, 2008 na auai atu ai nisi o faiaoga o le Kolisi i le mafutaga a le Sosaiete Suesue i le Tusi Paia Faavaomalo sa faia i le Iunivesite i Aukilani, Niu Sila. E toailima selau le aofai o faifeau, faiaoga, aoao, ma soo se isi lava e fiafia e suesue toto'a i mataupu tau le Tusi Paia sa auai. E le gata o sui mai Europa, Peretania, Amerika, Aferika, Asia, ae faapea foi le Pasefika. O se mafutaga e faia i tausaga uma i Europa poo Amerika, a o se tausaga muamua lenei ua fai mai ai iinei i le Pasefika.

O le Sosaiete Suesue i le Tusi Paia, o le sosaiete faavaomalo aupito leva lea ma le toatele. Na faavaeina i le tausaga 1880 i Niu loka, ma o le taimi nei e 8,500 le aofai o le sosaiete. O le sini autū o lenei sosaiete ia lagolagoina ma faaolaola suesuega i le Tusi Paia. O le faamoemoe o le Sosaiete ia (a) alualu i luma suesuega Tusi Paia i lotoifale (contexts) o loo faaaogaina ai; (e) galulue ma faalapopotoga (kolisi faafaifeau) i le lagolagoina o suesuega Tusi Paia; (i) atia'e punaoa (resources) a nei faalapotopotoga mo suesuega Tusi Paia; (o) tatala le avanoa i nei suesuega mo soo se isi e fia auai; (u) ofoina atu le lagolago ma avanoa i faifeau ma faiaoga e auai mo le faalau-

teleina o le malamalama i le Tusi Paia; (f) tapena mafutaga ma fonotaga e fefaasoaai ai le au suesue o le Tusi Paia; (g) faia o lomiga mo suesuega eseese faa-le-Tusi Paia.

O le amataga o le Sosaiete sa malos i Amerika ma Europa. Ae talu ai ona ua faatau le faauigaina o le Tusi Paia i lotoifale (contexts) o loo faaaogaina ai, lea na agai mai ai loa ana galuega i Aferika, Asia ma le Pasefika. I le taimi nei ua mautu ana fesootaiga i Aferika ma Asia, ae o loo tau amata fesootaiga i le Pasefika. Ma o se tasi foi lea o mafuaaga ua fai mai ai i Aukilani lana mafutaga.

E toafa sui o le Kolisi na auai i le mafutaga i Aukilani. Sa faatupeina lava e le sosaiete pasese malaga ma fale talimalo sa nonofo lata ane ai i le Iunivesite. E lima aso o le mafutaga ma e amata i le 8am i le taeao e tau i le 9pm i le afiafi. Sa vaevaeina suesuega i vaega tetele o le Tusi Paia: o le Feagaiga Tuai, o le Feagaiga Fou, o le talafaasolopito, o le mataupu silisili, ma metotia e faauigaina ai le Tusi Paia. Ona e fai faatasi i le taimi e tasi suesuega i nei vaega, sa lē mafai ona auai i suesuega uma. Sa filifili lava e le sui poo a suesuega e fia auai ai.

O le autū o lenei mafutaga ia faasoa le au suesue ma tapena a latou

pepa mo le lolomiina i tusi mo le faalauiloaina mai. O se tulaga mataina le maoa'e o le malamalama o le au fai pepa ia latou mataupu. Sa mafuta ai foi ma nisi o le au suesue lauiloa i lenei vaitau, o e ona tusitusiga (commentaries) o le Tusi Paia, e pei o David Clines, Norman Habel ma Carol Newsom o le Feagaiga Tuai, ma Duane Christensen, Elaine Wainwright o le Feagaiga Fou. E le gata ina faalateleina ai le malamalama i suesuega Tusi Paia faanei ona po, ae faamautuina ai foi fesootaiga ma nei tagata suesue.

I le taimi nei, o loo lagolagoina malos i le sosaiete tusitusiga mai le itupa o tina ma tamaitai. O loo taumafai foi le sosaiete e atina'e suesuega ma tusitusiga mai le Pasefika. Ua iai nei se faalapopotoga a le sosaiete mo le au suesue Pasefika i Aukilani.

E lagona e le Kolisi le agaga faafetai mo le avanoa faa-auro sa mafai ona auai atu ai nisi o faiaoga i le mafutaga a le Sosaiete Suesue i le Tusi Paia. E le gata o se mafutaga e faalateleina ai le malamalama i le Tusi Paia, ae taua foi mo le Kolisi i lana galuega suesue. Tau ina ia viia pea le Alii i galuega lelei a lenei sosaiete mo le faalateleina o ana Afioga Paia.

SOUTH SEAS CHRISTIAN MINISTRY

O le au malaga a le South Seas Ministry o se tasi lea o malo masani a le Kolisi mai Amerika i tausaga uma. O lea aumalaga e masani ona taunuu i le masina o Aukuso mo a latou polokalame e le gata mo le Kolisi ae faapea foi le tupulaga talavou (junior youth) ma le fanau laiti. Ma o le tausaga nei na taunuu mai ai lea aumalaga masani a le Kolisi ma api ai i totonu o le Kolisi mo le lua vaiaso (2-17 Aukuso 2008). E lua vaega na vaeluaina i ai lenei aumalaga. O le vaega muamua latou te faatinoina polokalame e pei o aoaoga ma

taaloga mo le tupulaga talavou ma le aoga Aso Sa. O le vaega lea na muamua taunuu mai (2 Aukuso) na taitaiina mai e le susuga ia Pastor Ron Gallagher, ma e tasi le vaiaso e faatino ai a latou polokalame. O le vaega lona lua o faifeau na taunuu mai i le vaiaso na sosoo ai ma o i latou ia e masani ona fai a latou mataupu i aoao o le Kolisi.

E tele foi ni meaalofo na omai ma lenei au malaga e pei ona masani ai i tausaga taitasi ma o nei meaalofo e mo le Kolisi faapea foi ma le aoga Aso Sa. Peitai na tali foi i ai

le susuga i le Alii Pule ma le mamalu o le Kolisi i lana aiga faaleaiga (fellowship meal) e masani ai ma tauaao ai loa ma ana foi meaalofo o laei Samoa ma mea taulima. Na faafetaia e le susuga a Otele le aumalaga ona o le sosia na tauaaoina aemaise a latou polokalame taua ma le aoga na faatinoina mo le Kolisi. Na matauina foi le faamalieina ma le fiafia tele o le aumalaga a le South Seas i lea po. Na faaiuina lea mafutaga i le viiga i le Atua, lulu aao loa ma faatofa.

RIPOTI A LE PA POVI

Ua tini pao nei le uto e pei o le fetalaiga i faiva i Tapalega, ua atoa tupe i le fala aua ua fao le vaa o mala, ae folau pea le Kolisi i Malua i le vaa o manu. E le faaitiitia ai le faamanu ma le viiga i le Atua Silisili ese, aua o lana lava pule faasoifua, ua ia taitai mai ai i le manuia i tatou i le iuga o galuega faaleaoga o lenei foi tausaga 2008.

Aua o lo tatou ola, e faitauina faatasi ma mea e faigofie ona faaumatia o le ola nei. Ua faatusaina foi i le puao e aliali mai ma toe mou atu, o le mutia foi e lauusi i le taeao, ae magumagu i le afiafi. Ae peitai, ua le o lea le finagalo alofa o lo tatou Atua mo i tatou lana fanau. Afai la ua manuia ma matagofie mea uma, ona tatou faapea ifo lea e pei o la le Fai Salamo, 'ANA LE SEANOVA LAVA LE ALII NA IA TEI TATOU'.

Ia o sina ripoti puupuu lenei mai le vaega a le Pa Povi i lenei foi tausaga 2008. Mai le masina o Fepuari, e 31 le lafu na amata ai. E oo mai i le masina o Iuni ua 35, o le faaiuga o le masina lava lea na fuaina ai ni manu se 2 mo tupe maua a le kolisi ona totoe lea o le aofaiga e 33. Pe tailua pe taitolu foi masina ma fanau taitasitasi aumatua o le lafu.

O le masina o Aokuso, na faalalo ai le tasi manu mo le Mafutaga Faafouina. O le faaiuga o Oketopa, na faatauina ai ni tamai povi se 2 e le susuga i le Faafeagaiga ia Tavita Pulu mo le amataga o sana atinae i lana ekalesia fou i Togo. O le tasi o faafitauli ua amata ona toe tulai mai, o le tele o taifau latou te faaumatia tamai povi fou faatoa fanau mai. Ma e iai se tamai povi e tasi na faatamaia ai i le masina ua tuana'i. O le amataga o le vaiaso nei na fua ai isi povi e 2, i le tau e

\$1800 i le povi e tasi, ae o le Aso Tofi, e tasi le povi na faalalo mo kuka o le faamanuia. E oo mai lava la i le taimi nei, e 29 le aofaiga o le lafu o loo totoe mai.

E iai nisi o galuega faapitoa i totonu o le kolisi, e pei o le au palama, au fai moli ma le au teu laau, o e gafa ma le faamamaina o fale taele, ma le vaega lenei ua taua o le vaega a le pa povi. E taua nei galuega faapitoa uma, peitai o le pa povi lava ia o se vaega ua fesoasoani malosi i tupe maua a le kolisi, aemaise i le faagaioiina o lana faletusi.

O le susuga i le faiaoga ia Vaitusi Nofoaiga, na avea ma faaululuga o le vaega a le pa povi mo lenei tausaga. E toafitu lava i matou o aoao na galulue mo le vaaia o lenei atinae a le kolisi, ma e tofi le tagata ma lona tomali faapitoa e faaogaina mo le lelei o galuega a le pa povi. O susuga ia Kamuta ma Faafetai o aoao mai Niu Sila, e iai so la tomali faapitoa i le itu tau fasi manu. O le susuga ia Filiilagi, ua tele foi tausaga o galue i le Ofisa o Faatoaga i le itu tau lafu manu. O le susuga ia Tupou o ia o se ave taavale mo lenei vaega. O le susuga ia Vaituu o ia o se fai lafumanu ao lei ulufale mai i le kolisi. O le susuga ia Kolia, o ia sa gafa ma le faamau-mauina o le aofaiga o le lafu i masina taitasi, ma lipoti ni povi ua mama'i, mo se fesoasoani mai a le Ofisa o Faatoaga. A o lou nei tagata, o sina tomali faatauva sa faaleleia ai iliafi, atoa ai ma le faaogaina i taimi o galuega. E le gata foi i lea, ae o le faalaloina o manu i le laau malosi, i soo se taimi e manaomia ai. O nei tomali eseese, na tulai mai ai se vaega mautu i lenei tausaga. O a matou galuega mulimuli mai ia Oketopa e oo mai i lenei masina, o

le faaleleia lea ma kilia le uaea i lona faataamilosaga i fafo, atoa ai ma faalava i totonu o lotoa e sefulu o loo sui auauai iai manu. E le gata i lea, a ua toe poupuu ia malosi, ina ia aua nei pa i fafo le lafu, i taimi o le faamuli, i le tuuaga umi o le a alo atu iai.

E malie lava nisi aso, aua e tele ina talasua aoao ma faapea mai, o le vaega a le pa povi o loo tafafao i le vaomatua. Peitai, matou te le amanaiaina ia lafoga, aua o le mea moni, e fiu e tau faasufi se aoao e sau i le vaega a le pa povi, ae le mafai. Ona iloa ai lea, leai e le faigofie le galuega. Tele foi nisi uso sa auai, a ua taitasi ma faamaamulu. Ona manatua ai lea i le loto si o matou taitai ia Levesi ao matou mafuta ai i nisi tausaga ua alu, na ia faamalosi mai - **'Ana i ai lava nisi, semanu e le tofia outou'**

Ia avea ai lenei itula e momoli atu ai le agaga faafetai tele i lau susuga i le Alii Pule Otele Perelini, mo le tali mai i nisi o mea na manaomia mo le faaleleia o a matou galuega. O le agaga faafetai foi i le susuga i le faiaoga ia Vaitusi, mo fuafuaga lelei ma le taitaiina o le tatou vaega. Faamalo i le tatou au-uso le galulue ma le faamalolosi, ao avea ai i tatou ma e vaaia lelei, lenei atinae a le Kolisi i Malua.

Ia fesoasoani mai le Atua ia tatou fuafuaga faaii o lenei tausaga. Ia saunia pea i tatou, mo ana feau o le lumanai.

IA MANUIA LE KERISIMASI MA LE TAUSAGA FOU

Soifua
Charles Lualua Fidow. [sui taitai]



Taitai o le vaega pa povi - Kolia ma le faletua



O le tapuaiga o galuega a le nu'u

I'ULEO O LE MALUAPAPA



Solinuu, Suia, Torise, Samira,
Naima



Salataima, Lile, Lalokava, Vaiola,
Theresa, Mile



Litara,
Lemau



2008 Champions—GREEN!



Pua, Faalua, Vaipou, Fetutasi, Lapua, Amata ma Tracy



Vaiola



Lemau, Toese ma Perise



Pauline ma Fuarosa



Sina ma Theresa



Lotu



Fuarosa, Lipale, Vesia, Makerita, Toiata



Regina ma Asofiafia



Leeara ma Sapi



Tineimala, Faalua, ma Sarona



Sarona



Feula ma
Regina



Torise ma Makerita



Sina, Theresa, Lalokava
ma Michi



Maria, Cynthia, Fuarosa, Navy



Latitude, Tua, Roseta ma
Nuuausala



Faalua ma Maria



Tineimala ma Salataima



Samira, Solinuu, Feula, Torise, Salataima ma Suia (i luma)

Komiti o le Maluapapa

Peniamina Leota, Makesi Neemia, Terry Pouono, Saipele Maiava, Seilala Luamanuvae, Alesana Pala'amo
Malua Theological College

www.malua.edu.ws

© 2008